



Rabu, 27 Juli 2022

Ogen: 1 Korinti 7:3-5



Nehken Tanggungjawab



Jabu e gambaren hubungan perpulungen ras Dibata. Bagi kegeluhen ndehara ras perbulangen si sempabu bage kalah hubungan perpulungen ras Dibata.

Siakui maka kekelengen e pengiket perbulangen ras ndehara. Arah kekelengen e erbahanca ngasup kita ngaloken sada ras sidebanna, lit keterbukan bage pe saling berbagi. Kegeluhen perjabun arus tetap njaga kebadian, e maka tangkas bas kitab Heber 13:4 ikataken "kegeluhen perbulangen ras ndehara bas perjabun la banci melket, Dibata pagi ngukumsa kalak sierlagu la mehuli bage pe erlua-lua."

Teptep anggota bas jabu tentuna lit tugas ras tanggung jabap si arus ilakokenna bage pe ialokenna. Si dilaki nehken tugasna man ndehara bage pe sideberu selaku ndehara. Perbulangen lanai ia erkuasa nandangi kulana tapi ndeharana, janah ndehara lanai erkuasa nandangi kulana tapi perbulangenna. Enda erkawiten ras hubungan ndehara ras perbulangen. Hubungan si cukup intim si ilakoken sebage cinta kasih (kekelengen). Siakui maka hubungan enda pemere Dibata kap, janah arah hubungan enda ikatan cinta kasi semakin erat sada ras sidebanna.

Hubungen enda mekattep sigelari hubungan seks. Bas ogenta Paulus mpersingeti jabu-jabu Kristen gelah perbulangen ras ndehara bas jabu e la nulak kerincuhen seks, segelah ola icubai Iblis erkiteken la ngasup nahansa.

Realita siidah kita melala kel si rontang perjabun erkiteken hubungan seks si la sehat. Lit deba ngelakokenca hanya terjeng kepuaskan diri, lit ka alu terpaksa, lit ka si jajan seks ras sidebanna. Enda banci ipake Iblis guna erbahanca rontang jabuta. Pengarapen gejalalah maka e pemere Dibata, silakoken alu dem cinta kasih (kekelengen), arah cinta kasih e maba keriahen (kegembiraan) seh maka sempabu jabu e.